

# 4 protokol kesihatan ketat bawa pulang rakyat

## Jalani kuarantin 14 hari sebaik tiba di Malaysia

Oleh Ilah Hafiz Aziz  
illahhafiz.abdulaziz@bh.com.my

**Kuala Lumpur:** Misi membawa pulang rakyat Malaysia di Wuhan, China melalui pesawat khas hari ini akan melalui empat fasa protokol kesihatan yang ketat.

Menteri Kesihatan, Datuk Seri Dr Dzulkefly Ahmad, berkata pertama adalah fasa pelepasan atau 'pre departure' yang sedang dilaksanakan beberapa pihak termasuk Kementerian ketika ini.

"Fasa kedua membabitkan protokol dalam penerbangan dan fasa

ketiga ialah apabila pesawat itu tiba, termasuk persediaan dalam pesawat.

"Fasa keempat adalah saringan kesihatan (terhadap rakyat yang dibawa pulang) untuk diletakkan ke tempat tertentu, termasuk pemantauan di rumah," katanya dalam temu bual khas di *Buletin Utama TV3*, malam tadi.

Timbalan Perdana Menteri, Datuk Seri Dr Wan Azizah Wan Ismail yang juga Pengerusi Jawatankuasa Pengurusan Bencana Pusat, berkata hanya rakyat Malaysia di Wuhan yang sihat dibenar menaiki pesawat untuk dibawa pulang dan menjalani kuarantin 14 hari sejeurus tiba di tanah air.

Dzulkefly berkata, misi kemanusiaan itu adalah komitmen besar dan ditunggu negara se-



**Sebahagian peralatan persediaan misi membawa pulang rakyat Malaysia dari China di KLIA2.**

lepas mendapat keizinan dari China.

"Rakyat Malaysia yang disyaki mempunyai simptom 2019-nCoV akan terus ditahan dan dikuarantin di China.

"Kita sudah menjangkakan misi ini (membawa pulang rakyat) dan hanya menunggu kebenaran China," katanya.

Beliau berkata, Malaysia tidak

terlewat menangani kes penularan coronavirus (2019-nCoV) kerana sudah memulakan langkah itu seawal 5 Januari lalu.

Katanya, persediaan dan kesiapsiagaan negara adalah lebih awal berbanding pengumuman oleh Pertubuhan Kesihatan Sedunia (WHO).

"Kami mendapat maklumat mengenai situasi ini sejak Disember

tahun lalu, maka Pusat Kesiapsiagaan dan Tindak Cepat Krisis Negara (CPRC) digerakkan ketika itu.

"Kita mengesan kes pertama pada 23 Januari dan ketika itu CPRC juga sudah bermula. Sebanyak 57 hospital mampu melakukan saringan dengan 26 lagi sedia untuk menerima pesakit untuk dirawat," katanya.